

Regional News Unit AIR Aizawl  
Tuesday, April 09, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Lok Sabha inthlanpui neih mekah Mizoramah pawn chhuak theilo te tan ina vote an thlak theihna tur ruahman sak an ni .
2. Chief Electoral Officer Pu Madhup Vyas-an Lok Sabha inthlanpui neih mek dinhmun thlirin nimin khan Kolasib a tlawh.
3. Lok Sabha inthlan thawh khatna ah chuh tuma hming pelut 1625 an awm tih Election Commission chuan a sawi



### HOME VOTING IN PROGRESS

Lok Sabha inthlanpui neih mekah Mizoramah pawn chhuak theilo te tan ina vote an thlak theihna tur ruahman sak an ni a,

Aizawl District chhunga Assembly bial thenhran 12 ah Election Commission of India (ECI) ruahman angin kum 85 chin chunglam leh rualbanlote, vote thlak tura polling station pan tura harsatna neite tan mahni in lum atanga vote an thlak theih na tur Home Voting hi kalpui a ni.

Aizawl District ah Assembly bial thenhran 12 ah home voting ti turin mi 874 chhinchhiah an ni a, an zinga 54 chu rualbanlo an ni. Hemi atan hian election duty mi engemawzat chu team 22 an inthenin Assembly segment hrang hrang an kal a, Postal Ballot hmangin vote hi nimin khan thlaktir an ni.

Lawngtlai District ah pawh assembly bial pathumah nimin atang khan inlama vote thlak ngai, absentee voter-te'n postal ballot hmangin vote an thlak tan a.

In lama vote thlak tur te vote thlaktir turin Tuichawng leh Lawngtlai West bialah mobile polling team pakhat ve ve leh Lawngtlai East bialah mobile polling team pahnih siam a ni a. He'ng mobile polling team-te hian nimin atang khan Lawngtlai District chhunga kum upa leh vohbik mahni in lama vote thlak turte chu an inah kal chilhin postal ballot hmangin vote an thlaktir a. Home voting hi tun thla ni 13 thlenga kalpui tura ruahman a ni.

Tuichawng bialah home voting dil 23, Lawngtlai West bialah 22 leh Lawngtlai East bialah home voting dil 99 an awm a. Lawngtlai District-ah a pum puiah home voting dil 144, kum upa 140 leh rualbanlo 4 an awm a.

He'ng bakah hian Lawngtlai District atangin essential service atanga postal ballot-a vote thlak dil 26 awm bawkin, an zinga mi pasarih chu Lawngtlai District chhunga vote nei an ni a. Nimin atang khan an ni tan hian vote thlak theih hun hawn tan a ni a, ni 10 thleng hun hawn niin, chawhma dar 10 leh chhun dar 12 inkarah vote thlak theih a ni.

Siaha district huam chhunga 'Essential Service Voter' te chuan Voter Facilitation Centre, DC. Office- ah postal ballot hmangin nimin khan vote an thlak tan a, Pu V.L. Hruaizela Khiangte, District Election Officer chuan 'Voter Facilitation Centre' hawngin vote thlak hi tan nghal a ni.

Kan corr tarlan danin, Sawrkar Department pathum- Prison, Medical leh Power & Electricity atangin Voter- 14 ten vote hi an thlak a, nimin vek khan vote thlak zawhfel beisei a ni.

Saitual District-ah nimin atang khan Home Voting tan a ni a, hemi atanhian Polling Party te chu an kalna hlat dan azirin nimin zing dar 5 atang khan DC Office tual atangin an chhuak a. Home Voting hmanga vote thlak tur hi Saitual District huam chung Assembly bial pathum Chalfilh, Tawi leh Lengteng-ah mi 194 chhinchhiah niin hriat theih chinah vote thlak upa ber chu kum 100 mi, Zadenga NE Khawdungsei II a mi a ni.

Mamit ah pawh Home Voting tan turin inbuatsaih a ni a, nimin khan Mamit DC Office-ah Training buatsaih a ni a.

Election Officer Pu Lalsanglura chuan home voting turah mawhphurna neite chu uluk taka Training tur leh an mawhphurna tha taka hlenchhuak turin a chah a. Mamit District chung Constituency 3-a khaw 34-ah PwD 30 leh kum upa 82, an vaiin 112 in lama vote thlak tur hi an awm a ni.

Home Voting Team hi 11 awm in member 2, Poll Officer leh Micro Observer an awm a, tukin dar 7 atang khan Home Voting Team te hi an feh chhuak tan ang.



## HACKVENTURE 2.0

Mizoram Police leh NIT Mizoram-te tawngkawpiin a an buatsaih, ni thum awn tur, National Level Hackathon event – “Hackventure 2.0” chu nimin khan Mizoram DGP, Pu Anil Shukla-an Arya Mess, PHQ-ah a hawng.

He hunah hian Pu Anil Shukla chuan Hackathon event hi Mizoram police-te leh mipui inkara inkungkaihna tha zawk siamna tur atan mai bakah tunlai thiamna thar ber hmanga kawng hrang hrang a police hna pui theihna tur atana thalai ho thiamna, finna leh hriatna sawr chhuah a hman chhuah theihna tura buatsaih anih thu a sawi a. Police hnaah chuan data kaihnawih thil a tam avangin database mumal leh tha zawk neih nan leh sualna tam zawk pumpelh anih theih nan he hun buatsaih kalflang hian technology chu tangkai zawka hman dan duan chhuah anih theih ngei a beisei thu sawiin NIT, Mizoram nena thawhona tha tak an nei thei chu lawmawm a tih thu a sawi bawka a ni.

“Hackventure 2.0” hi Mizoram Police leh NIT Mizoram-te tawngkawpin an buatsaih Hackathon vawi hnihna niin he event-a tel tura sawmna hi India ram NIT zawng zawng mai bakah Mizorama engineering institution hrang hrang hnenah thawn chhuah a ni a. An tum ber chu IT product, Mizoram Police-in an mamawh tur duan chhuah niin he contest hian Police tana tangkai tur, IT lama ruahmanna mai bakah idea hrang hrang tuai hnum a hman tak tak theih tur chher chhuah a tum a ni.



## CEO VISIT KOLASIB

Chief Electoral Officer Pu Madhup Vyas-an Lok Sabha inthlanpui neih mek dinhmun thlirin nimin khan Kolasib a tlawh a, Kolasib DC Conference Hall-ah Kolasib district-a inbuatsaihna hrang hrang kalpui dan endikin Election kaihnawih a Nodal Officer leh Sector Magistrate-te a thutkhawmpui.

CEO chuan mipui aiawh thlan chhuahna tura vote thlak ngaih pawimawh kawng ah State dangte entawntlak khawp a ‘Model State’ ni tur a tan lak a pawimawh thu sawiin state Assembly inthlanna nen a khaikhin chuan Lok Sabha inthlanna ah vote a tlak tlem hle thin thu a sawi a. Mipuite aiawha rorelna sanga ding tur thlan chhuahna a vote thlak thei nih a hlut zia inzirtir a tul thu sawiin vote thlak zat dik tak hriat theih nan Electoral Roll uluk tak a ennawn leh vawn that a ngaih thu a sawi bawk a ni.

He huna tarlan anih danin, Kolasib Dist ah hian Vote nei mi 63819 an awm thu te, chung zing a mi 2853 chu vote nei thar, kum 18 leh 19 inkar an nih thu a sawi a. Vote thlakna tur Polling Station 89 zing a 11 chu hmeichhe enkawl, ‘Women managed Polling Station’ a ni anga, Polling Station za zel a 60 chu internet nen a thlunzawm a Web Casting hmang a vil theih tur a ruahman a nih thu a sawi.

He thutkhawm hi Deputy Commissioner Pu John LT Sangan kaihruiin SP Pu David H Thangliana chuan inthlanna kalpui chhung a dan leh thupek kenkawh a nih theih nana inbuatsaih dan a sawi a. Inthlan hun a Election official-te leh vote thlak tur te tan Polling Station-ah inthiarna, tui intur thianghlim leh kawlpheha thlunzawm a nih dan te tarlan niin mipui hnen ah ruah tui khawl pawimawh zia pho lang thei tur ‘Unique Polling Station’ buatsaih a nih thu tarlan a ni bawk.

<><><>

## LADC MNF

Lai Autonomous District Council (LADC) a MNF Legislature Party chhunga thuneihna inchuhna kalzel ah, nimin khan MNF, MDC pasarih ten MNF Party atanga banna an thehlut.

MNF MDC pasarih bangte hi Pu Manghmunga Chinzah, Pu T.Lalengmuana, Pu V.Zathanga, Pu BN Thangpuia, Pu Tutura Singh, Pu L.Lahmachhuana leh Pu CL Lianzuala ten an ni a, nimin khan MNF District Hqrs Lawngtlai President hnen ah banna hi an thehlut a ni.

Puan tawh thin angin LADC a MNF Legislature Party chhungkaw buaina vangin MNF Legislature Party a MNF, MDC te leh BJP, INC, ZPM leh Independent Member an vaiin MDC 13 ten Chief Executive Member(CEM) chuan thlawptu a ngah tawklo tih Governor ah an thlen hnu ah CEM Pu V.Zirsanga chuan floor test neih hmian CEM atangin banna a thehlut a. Hetihlai hian MDC 13 intelkhawm zinga pakhat chu lehlamah pakaiin, Elected Member 24 awm mekna LADC ah tumah Sorkarna siamthei awmlovin Member 12 ve ve an awm tak vangin Governor chuan LADC thuneihna laksakin thlaruk chhung atan LADC enkawl lailawk turin Lawngtlai DC chu dah a.

LADC ah hian Elected Member 25 awmin Assembly inthlanpui neihah khan Chandmary bialtu MDC Dr.Lorraine Lalpekliana Chinzah chu Lawngtlai East bial ah MLA atan thlantlin a ni a, Dr.Lorraine hian MDC a nihna a bansan tawh avangin tun dinhmunah LADC ah hian Elected Member 24 an awm mek.

<><><>

## LS ELECTION

Lok Sabha inthlan thawh khatna neih tur atan nomination file hun khar a ni a, Election Commission sawi danin Parliamentary constituency 102-aah candidate 1625 an awm a. Candidate 1625 zinga mi 1491 chu mipa niin, 134 te chu hmeichhia an ni. A thawh khatna atan hian tun thla ni 19-ah vote thlak a ni ang.

<><><>

## PM

Prime Minister Narendra Modi leh BJP hruaitu te chuan Maharashtra leh chhatisgarh tlawhin, Pu Modi a chuan BJP sorkar in tribal leh hnam hnuaihngung zawk te tan an khawsak ti awlsam tur leh an hmasawna thlen tur in theihtawp a chhuah dawn a ti a, nimin khan Chhatisgarh a vantlang hma a thu a sawi naah Pu Modi chuan mipui te duhthusam leh suangtuah thin chu an sorkar chuan tih puitlin ngei a tum a ti a, BJPsorkar chuan kan ram hmasawna tur in theihtawp a chhuah don a ni ati.

Kum 10 BJP sorkar na hnuai ah mirethei zawk te chhawmdawl na tur in scheme hrang2 an siam a, central sorkar chuan mi rethei zawk te dikna a humhalh tlat a, Chhatisgarh a Bastar region hi a ti chiang tu ani a ti bawk a ni.

<><><>

Akashvani Aizawl Regional News Unit chuan Whatsapp ah chanchinthar ngaihthlak theih turin a chhawp chhuak a, All India Radio News, Aizawl channel link hi AIRNews facebook page ah leh X ah te hmuh theih a ni.

<><><>